

Regional News Unit AIR Aizawl
Monday, December 16, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Hunpui lo thleng turah Aizawl Traffic police te chuan ngawrh takin khawpui chhung-ah duty insiamin lirthei vakvelte lakah khauh lehzualin mipui himna atan hna an thawk mek.
- Chief Minister Pu Lalduhoman Serchhip chu ramchhunga adventure sports atana hmun tha ber pawl a nih avangin Adventure Tourism hmasawna atana hmun pawimawh tak a ni, a ti.
- CADC-a MDC ngah ber ni ta ZPM MDC 10-te chuan CADC-a sorkarna siam thei an nih thu hriattir turin vawiin hian Governor hmuh an tum.

<><><>

PARAGLIDING

Chief Minister Pu Lalduhoman Serchhip chu ramchhunga adventure sports atana hmun tha ber pawl a nih avangin Adventure Tourism hmasawna atana hmun pawimawh tak a ni, a ti.

International Paragliding Accuracy Championship leh Air Sports Festival 2024 kharna Serchhip Zawlpui-a neihah he thu hi sawiin Chief Minister chuan infiammite tumruhna leh inpekna a fak a. Ram dangte nena inpawhna leh inthianthatna siamna kawnga he hun pawimawhzia sawiin, Mizoram chu adventure tourism hmunpui a nih theih dan a tarlang bawk. Serchhip khawpui boruak muanawm, mawi leh hmuhnawm takah paragliding atana hmun tha tak a awm chu lawmawm a tih thu a sawi a. Tualchhung Mizo pilot-te thawhrimna chu lawmawm a tih thu leh a chhuan thu leh heng pilote te inpekna leh thiamna te bakah Mizoram Sawrkar, MASA, FAI leh Serchhip mipuite thawhhona tha tak avangin he Championship hi a hlawhtling a ni, a ti bawk.

Tourism Minister Pi Lalrinpuii pawhin International Paragliding Accuracy Championship hlawhtlinna tura thawktu zawng zawng chungah lawmthu a sawi a. Ram dang atanga lo kalte pawh championship chu anmahni vanga hlawhtling a ni a, an rama an haw leh hunah pawh Mizoram hre reng turin a chah a ni.

He championship-ah hian ram paruk—India, Korea, Kazakhstan, Spain, Indonesia leh Nepal atangin infiammi mi 30 an tel a. Mipa inelna-ah Aman Thapa (Nepal) chu pakhatna a ni a, Pahnihna chu Yuda Mesa Putra (Indonesia) a ni.

He inelnaah hian pathumna chu Akshay Kumar (India) a ni. Hmeichhe intihsiakna-ah Eun Young Cho (Korea) chu pakhatna niin Disha Fajar Praharini (Indonesia) chu pahnihna a ni a, Alisha Alisha (India) chu pathumna a ni.

<><><>

AIZAWL TRAFFIC

Hunpui lo thleng turah Aizawl Traffic police te chuan ngawrh takin khawpui chhung-ah duty insiamin lirthei vakvelte lakah khauh lehzualin mipui himna atan hna an thawk mek.

Aizawl Traffic SP Pu Stephen Lalrinawma chuan zan lamah dar 12 thleng an duty a an chhuah thin thu leh mipui an lo him zawk na'n zing lamah pawh sumo, bus leh taxi chhuak tur te chu zu in chung a lirthei an khalh mai mai loh nan lirthei leh a khalhtute endik hna kalpui a nih tur thu a sawi a. Mipui leh lirthei chhuak a tam tawh dawn avangin traffic jam tihzia-awm na'n lirthei kalna siksawi danglam a tulna lai a awm thei a, siam a nih pawhin mipui te'n hrethiam turin a ngen a. Tawhsual leh vanduinaina thleng a awm loh nan mipui pawh kawng kanna tura siam-ah chauh kawng kan turin a ngen bawka ni.

Traffic SP chuan kumin hunpui Krismas leh kum thar lo thleng tur inbuatsaihna kawngah traffic dan te zawmin, rui chung leh dan zawm lo-a lirthei khalh chu chetsualna thlen thei leh mahni fimkhur loh avanga midangte'n chhianatna an tawn theih avangin traffic dan leh hrai te zawm hram hram turin lirthei khalhtute a ngen a ni.

<><><>

CADC

Chakma Autonomous District Council (CADC)-a MDC ngah ber ni ta ZPM MDC 10-te chuan CADC-a sorkarna siam thei an nih thu hriattir turin wawin hian larsap Hari Babu Kambhampati hmuh an tum.

ZPM General Headquarters President Pu Lalliansawta chuan Inrinni khan ZPM pisa-ah an party zawm thar CADC MDC 5-te lawmluhna hun a hmang a. Heti hian CADC-ah ZPM Party chuan MDC 5 a neih sa tawhte leh tuna MNF MDC 5, ZPM rawn zawm thar mi 5 te nen MDC 10 a nei ta a, CADC-ah MDC ngah ber party a lo ni ta a ni, a ti a. Kalphung thar, mipui sorkar chuan Autonomous District Council-a party dang sorkar lai thiah tumin sorkar chakna nen hmalakna a nei ngai lo niin a sawi a. Chutih laiin anmahni duhthu ngei a ZPM rawn zawmte erawh chu ZPM Party hian lawm takin a lo pawm thung a ni a ti.

CADC-ah hian MDC 20 awmin MNF MDC 5 te'n anmahni duhthu ngeia ZPM Party an zawm tak avangin ZPM Party chuan MDC 10 a lo nei ta a, BJP in MDC 9 an nei a, MNF in MDC 1 an nei ta a ni a ti a. Tunah hian ZPM Party chu CADC-ah MDC ngah ber party a lo nih tak avangin CADC-ah sorkarna siam tumin MDC 10 te chuan Thawhtanni-ah larsap hmuh an tum a ni, a ti.

He hunah hian Local Administration, District Council & Minority Affairs changtu minister Pu Lalsawivunga pawhin thu sawiin, CADC -a MDC 5 te'n an mahni duhthlanna ngeia ZPM Party an rawn zawm chu lawmawm a tih thu leh, Mizoram tan mai bakah CADC mipuite tan hmasawna thuantling thlentu ni turin duhsakna a hlan a, lawmluhnte atangin thusawi ngaihthlak a ni bawka. MDC 5 te lawmluhna ah hian ZPM General headquarters hruiute bakah MLA thenkhatte an tel bawka ni.

<><><>

BIOMETRIC ENROLMENT

Inhumhimna zawnga Mizoram awm mek Myanmar raltlan mi 33,000 chuante kutze thla leh mit naute thla lakkhawm (biometric enrolment) tihura ruahman chu tan hun tur a hriat rih loh.

Home department hotute hnen atanga thudawn danin biometric enrolment kalpui tur hian nikum lam atang tawh khan sorkar laipui a Ministry of Home Affairs chuan Mizoram sorkar chu a kar tawh thin a. Sorkar kal ta MNF sorkar khan nikum kum tawp lam khan assembly leh Parliament inthlan hnaih chhuanlamin bul tan rih loh turin thutlukna a siam a, hei bakah hian biometric lakna atana form an rawn siamte hi India rama raltlan rawn tlulut an rama thawn let (deport) leh turte chhinchhiahna atana an hman a nih avangin hman theih a nih loh thu Ministry lam hi hriattir a ni a. Sorkar thar a lo din hnu-ah pawh hetiang form bawk hi an rawn thawn leh avangin siamtha leh tura thawn let a ni a. Tun thla, December thleng hian biometric data lakkhawm tan hun hi pawhsei a ni chungin tun thleng hian Ministry of Home Affairs lam chuan kalpui turin thupek thar an la rawn nei rih lo niin home department hotute chuan an sawi a ni.

<><><>

DENGUE

Kumin thla chung hian Mizoramah Dengue hri vei mi 719 hmuhchhuah a ni a, an zinga mi 1 a thi.

Health & Family Welfare department hnuai a State Vector Borne Disease Control Programme (SVBDPC) hotute sawi danin kumin thla 11 kalta chung khan Dengue natna kai ni a inringhlel mi 8,562 thisen endik a ni a, an zinga mi 719 te chuan he natna hi an vei tih hmuhchhuah a ni a. Hri kai hmuhchhuah zinga 503 te hi Aizawl district ami an ni a, Lunglei district-ah Dengue hri kai mi 176 leh Champhai district-ah mi 14 hmuhchhuah an ni bawk a ni. Dengue natna hi Mizoramah kum 2012 khan hmuhchhuah tan a ni a, hemi kum hian he natna vei hi mi 6 hmuhchhuah an ni a. Kumtin hmuhchhuah a pung zel a. Kum 2020 leh 2021 a Covid-19 hri len lai khan tlem chho mah se a tam chho ta zel a. Kum 2022 khan mi 1,868-in he hri hi kai-in mi 5-in nunna an chan phah a. Nikum kha Dengue hri kan an tam ber a ni a, mi 12,949 thisen endik zinga mi 2,060-in kai-in mi 2-in nunna an chan phah a. Kumina nunna chan zat nen chuan Mizorama Dengue vanga nunna chan zat hi a vaiin 8 an tling tawh a ni.

Dengue natna hi thosi chi khat Aedes-in a put darh a ni a, hetiang thosi hian chhunah mi a seh thin bakah Mizorama a tam avangin fimkhur turin health department chuan mipui a chah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve ah Chanchinthar hi puan leh a ni ang.

<><><>

CYBERCRIME

Mizoram Police-a CID (Crime) hnuaiia Cybercrime Police Station chhinchhiah danin kum 2021 atanga kumin December ni 5 thleng khan internet hmansual kaihhnawihah mi 38 thiam loh chantir an awm tawh a ni.

Cybercrime PS hian kumin chhungin thubuai 39 an ziaik lut tawh a, chu'ng thubuai kaihhnawihah chuan mi 26 man an ni. He'ng an man zingah hian kumtling lo mi 6 an awm a, thubuai charge sheet tawh mi 14 leh thubuai ngaihtuah mek 14 a awm a. Thubuai chhui mek 19 a la awm bawk a. Kumin hian sum cheng nuai 39, sing 7, sang 4 leh 863 hmuh let a ni a, account hrang hrang atang sum tihchet theih loh a hrensak cheng nuai 15, sing 3, sang 1 leh 100 a awm bawk a ni.

Thubuai an ziah luh tam ber chu sum kaihhnawiha inbumna leh hursualna lam hawi a inbumna a ni a. Thubuai an ziahluh dangte chu - copyright bawhchhiatna-te, social media hmanga mi tihbuai te a ni.

<><><>

PM

Prime minister Narendra Modi chuan New Delhi a neih mek national conference of chief secretaries chu a kaihruai a. Pu modi hian conference ah thu a sawi a ni. He conference hi ni 3 awn niin state hrang hrang ah hmasawn na rual tlang tak a a kal theih dan tur leh state te nen a tha tak an thawh ho na tur leh hmalak dan tur te an rel. He conference in a tum ber chu state sorkar leh central sorkar pahnih te thawh hona chak leh tha tak neih tir a hmasawn na chak zawk nei tur a thawh hona tha zawk siam chu a ngaihpawimawh ber ani. Conference chhung hian state tin leh union territories a chief secretaries, senior officials te leh mithiam bik te sawm vek an ni a,

Chief secretaries Conference hi central leh state sorkarin kar ah inlaichin na tha tak siam na tur a tan a Pu Modi hmalak na pawimawh tak ani. He national conference vawi li na thupui hi "promoting entrepreneurship, employment and skilling-lverage and demographic dividend" niin entrepreneurship,employment leh kut themthiam na lam te tih hmasawn na tur niin state leh UT hrang hrang te a huam vek bawk ang. Thupui 6 a bik takin ngaihpawimawh ani a chung te chu thilsiam chhuah te, service, Rural Non-farm, renewable energy leh circular economy ah te hmalak na chak zawk kalpui ani dawn a ni.

<><><>